




God's Word Life for All

THE BIBLE SOCIETY OF UGANDA

SABITI ME BAIBULI 2012



**Wi kop mere:
Wan Okuunu,
doko Ootunu,
kede Otienu pi en**
Tice me Joor 17:28
(ESV)



KUMAM



The Bible Society of Uganda

SABITI ME BAIBULI 2012

WI KOP MERE: WAN OKUUNU, DOKO OOTUNU, KEDE OTIENU PI EN. TICE ME JOOR 17:28 (ESV)

Kop kame nyuto

Sabiti me Baibuli obedo yik kame bedo mwaka acelacel, kame wok kibut *Bible Soceiety of Uganda*, di eribere kede kanisan apapat, kede ajange ace kame tio kede kanisan. Kwero sabiti me Baibuli obedo gikame tweo wi yik dedede me mwaka acelacel, kame timere i sabiti me are me kare me Adibentu (yikere pi bino ka Kiriristo), i agege me Duwe me tomon kiwie are, arabo cengemogo etwero cakere i atiekini me Duwe me tomon kiwie acel. I mwaka katin noni Sabiti me Baibuli bino cakere ceng Sande i buto duwe 2/12/2012 tuno ceng Sande i buto duwe 9/12/2012.

I sabiti noni kosupo cuny Kanisan, Ikodeta atimo tice apapat, kede buli dano acelacel pi timo gigi:

1. Pi kwero i yore amalo Kop ka Rubanaga kame Kowandiko,
2. Lego pi tice dedede me *Bible Soceiety of Uganda*,
3. Penyo jo kobedo imemban me *Bible Soceiety of Uganda* pi rucakino doko imemban kanyen iyore me meede kede mino cul gi me buli mwaka,
4. Supo cuny jo kede rwako nying gi pi gin bedo imemban me *Bible Soceiety of Uganda*,
5. Coko giamia me konyo tice me *Bible Soceiety of Uganda*,
6. Cwano giamia kame kocoko i *Bible Soceiety of Uganda* iepone kame poore,
7. Nywako kede jo apapat anyim kame *Bible Soceiety of Uganda* tie geno neno, tice mege, kede gikame en etie caane mito cobo timo,
8. Kwero Ceng Sabato me Baibuli i buto duwe 8/12/2012 kede Ceng Sande me Baibuli i buto duwe 4/12/2012
9. Supo cuny jo somo Baibuli i kare dedede me kuwo.
10. Ka twerere, timo iik me poko Itabun Kacil i kanisan, twatwal mere i kanisan kame koyaro timo kiye tice me kwero Sabiti me Baibuli.

Sabiti me Baibuli mio kare kede winyo but kanisan kede but ngat acelacel pi konyo kede dongo cuny me tic kede Baibuli, di gin dedede kiribo teko gi karacel pi cobo kop noni; pire tek ne jokirisito dedede donyo i yik noni.

Wi kop me Sabiti me Baibuli me mwaka me 2012 en ine be: **“Wan Okuunu, doko Ootunu, kede Otienu pi en.” Tice 17.28 (ESV)**

Nan en kare kame jokirisito dedede poore cungo kede kitek i Rwot Ngalak Yesu Kirisito. Wan likame okarununu meede koko karacel kede piny ineno bala oliunu kede gen. Kare otieko tuno kame lero me kom Kirisito tie kede i piny; rieny me Kanisa bwono epone me colo dedede. Jokirisito poore ribo dwan gi, ribo yei gi, di gin deded karacel kiko gengo alwidar me gikarac i kare dedede me kuo.

Jamini atot kame tie bala peko oluko dano, mio ka ngatamoro likame tie kede gen me alako likame etwero pwono yik ka Ngacwec. Etie ilega kede gen wa be, Sabiti me Baibuli 2012 bino mino wa winyo kame wok ki kop ka Rubanga, pi Kuo, Ot, kede pi Bedo tie i Kirisito nakanaka i gi dedede kame wan oriamo kede.



WI KOP MERE: WAN OKUUNU, DOKO OOTUNU, KEDE OTIENU PI EN

CENG ME ACEL (1):

RUBANGA PAPA WA: EN AGEGE KEDE AJIKINI

"Rwot waco be, Cokerenu karacel,

bianu iyapiyapi, wun jo me atekerin apapat kobwot! Jo kame bedo tingo caljwogi me yen kame kopao, di kilego but rubangan kalikame karuno lako gi nogo, likame kitie kede ngec moro atwal!

Bia iketunu pido wu i nyim ekiko; mito kong jo kame gango pido nono por kop gi me pido! Ngai kowaco kop noni riki sek? Ngai kotuco riki sek be gi noni bino timere? Benyo, likame ango Rwot en kame riki atuco? Likame tie rubanga moro ace kwanyo ango kenekene, Rubanga kame timo gi kopoore, kede kame lako jo.

Lokerenu buta nan di ako bino lako wu, wun jo dedede me wi lobo! Ango en Rubanga acel kenekene kame tie. **Isaya 45:20-22**

Rwot Rubanga owaco be, "Ango en Alfa kede Omega," ngat kame tie nan, kame oudo tie sek kede kame bino bino, en Won Twer." **Gianyuta 1:8**

Yesu Kirisito dong di cal acala, nyoro kede tin kede ikar kede ikar. **Eburania 13:18**

Ngai inonono kame bin otimo manoni? Ngai en komio lwak me kare lung obedo tie cako iageini? Ango Rwot, riki atie i ageini, doko abino bedo tie i ajikini. **Isaya 41:4**

Ngai kotieko waco, cako riki sek, gikame bino timere i kare me anyim? Poore gin kiwace wa gikame bino bedo tie i kare me anyim. Kur ibedunu kede lworu moro, arabo mielkom; Wun ingeunu be cako riki sek tuno nataman ango atieko waco ne wu gi dedede kame oudo bino timere. Wun en ijurak nango! Benyo, tie bobo rubanga moro ace atek? Likame tie Rubanga moro apat atek kame ango angego akadi acel. **Isaya 44:7&8**

Olegunu:

*Rubanaga Papa wa katie malo, In itie kede twer adwong me lako dano. Wan tin oyei dub wa, doko olokere buti pi wudo kony. In ibedo tie cako i agege, akadi nan da in itie, doko iyaro bedo tie tuno i ajikini. Okwai imi wa oloi gi dedede kotieko tweno ngat acelacel, miere, ikodeta apapat, kede kanisa. Wan Olego i nying Yesu. **KMANO.***

CENG ME ARE (2):

OMOKUNU EKITE ME KUO KAME WAN OBINUNU LUBO

Rubanga otieko cibo di eko moko ekite me kuo kame poore aluba i piny, di eko kete i Iwandik Kacil. En etie kede loc i kom gi dedede.

Pi mano, poore igwokerenu kur ngatamoro wac i cunye be, 'Twer na kede teko na en komio ango abaro.' Do poore iyutununu be Rwot Rubanga wu en kame mio wun twer me udo abar, tetekeny en ecob isikan mere kame bin en ekwongere kede but joakwari wu, bala kame pwodi etie timo kede tuno tin. **Iwilia 8:17&18**

"Miero inen be isomo ne jo itabu me Iswil i kare dedede kame gin kitie wora kede; bed tamo kope mege iceng kede iwor, tetekeny ikaruno bedo di igwokere pi lubo gi dedede kame kowandiko iye. Manono bino mino ibedo kede mulem, doko gi dedede ko bino cobere ni kiber. Nan ango aciki be, bed dano atek di itie kede nwangcuny; kur ibed kede lworu amoto potocuny, pien ango Rwot Rubanga wu atie kedi i kabedo dedede kame



ioto iye.” **Yosua 1:8&9**

Wun jo atino, bedunu kede kilel, di ikounu camo kuo di pwodi wun ipongai kede apongai. Timunu gikame cuny wu mito kede kame wangu pwoyo. Do poore ingeunu be Rubanga bino ngolo ne wu kop pi gi nogo dedede. **Ngarab kop 11:9**

Ango amoi kede cunya lung; kur iweka aparao tenge ki lubo cik nin. **Sabuli 119:10**

Rwot oko waco na pi yamo ne jo be, “Nenunu, ango Rwot atie cibo i nyimu yote are: yongayo atero wu i kuo kede yongayo atero wu i to. Yerunu yongayo acel.

Yeremiya 21:8 (GNB)

“Wun itienu bala lero ne jo me piny. Bomba kame kogero i wi emukura likame kanere. Likame tie dano moro kame cwinyo etala di eko umo kede ebukit, do eketo kakame idelele pi mino jo dedede kame tie i ot lero. **Matayo 5:14&15**

Yesu owaco be, “Neningo, ango atie bino awakawaka, atie kelo giamia na me pwoc, pi culo ngat acelacel pi gikame etimo. **Gianyuta 22:12 (GNB)**

Olegunu:

*Papa Won Twer atie i malo, wan okwai kede mwolo pi konyo wa lubo ekite kuo kame in itieko moko i Iwandik Kacil pi wan lubo i kare me kuo wa i piny kan. Ka wan oriamo kede kope mogo, kony wa bedo kede nwangcuny di likame oko dubo bedo i ekite kame in imito ne wa, me wek obed kuo nakanaka. Wan olego i nying Yesu. **KAMANO.***

CENG ME ADEK (3): NGENO ISAWAN KEDE KARE

Kakame Yesu onoko kede bomba me Yerusalem di eko nene, en eko kok pire, di ewaco be, “Koto di oudo tin in ingeo gikame romo kelo ni mulem da! Do nataman kokano gi kibuti. Doko likame kibino weko kidi moro di odokakin i wi kidi ocelu, pien in likame oudo ingeo esawa me alako ni. **Luka 19:41-42&44b**

Rwot oko waco na be, “Ango atimo isikan kede iceng kede iwor, tetekeny gin kibed bino I isawan gi kame poore, isikan nono likame turere. **Yeremia 33:19&20 (GNB)**

Jamini dedede kame timere I piny timere I kare kame Rubanga omoko.

Ngarab kop 3.1 GNB

Bed bala jo tie kede pekini kame dio gi, do gi dedede tie kede kare kede epone me timo gi. Ateteni jo likame ngeo gikame bino timere i kare me anyim, doko likame tie ngat kame waco negi. **Ngarab kop 8:6&7 GNB**

Tek di piny pwodi tie meede bedo tie, kare bino bedo tie nakanaka me cuno kodi kede me kac. Kare bino bedo tie me ngico kede me lieto, me oro kede me iporo, iceng kede iwor. **Ageini 8:22**

Do kakame kare oromo kede kiber, Rubanga oko cwano Wode, kame dako onywalo, kame konywalo di eko bedo i loc me Iswil, me wek elak jo kame oudo tie i loc me Iswil, tetekeny Rubanga mi wa odok idwe mege. **Jogalatia 4:4&5 GNB**

Olegunu:

Papa me malo in icibo isawan, kare, kede ceng. Wan okwai pi mino wa timo gikame ber kalamo i kare acelacel me kuo wa. Mi jo ni upere kede in i kare me peko dedede kame gin kiriamo kede. Wan olego magi dedede i nying Yesu.



CENG ME ONGWON (4):

BEDO NGAWOK I EPONE KAME KOMITO NI

Ngat kame genere kede gikame titidi twatwal, udo egeneru kede gikame dwong da; doko ngat kalikame genere kede gikame titidi twatwal, udo likame egeneru kede gikame dwong da. Ka do ber wun likame igenerenu kede abar me piny kan kalikame genere, ngai do kame bino geno wu kede abar me ateni? Doko ka likame igenerenu kede jame ka ngat apat, ngai do kame bino mino wu kame mako wu? **Luka 16:10-12**

Lobo obedo me ka Rwot kede gi dedede kame tie iye; piny kede jo kame bedo iye obedo mere. **Sabuli 24:1&2**

Pi mano, ngat acelacel kibut wa bino tatamo gikame etimo i nyim Rubanga.

Pi mano, owekunu ngolo ne jo icegun kop, do akaka manono, oyeunu pi weko keto ne ngat ocelu gikame getaro en amoto kame dwoke cen ki yei mere. **Joroma 14:12&13**

Poore iterunu wa bala jotic ka Kirisito kede jogwok me mung ka Rubanga. Gikame mitere kibut jogwok en ine be, gin kipoore bedo jo kame genere. **1Jokorinti 4:1&2 GNB**

Di Rubanga oko waco be, "Otimunu dano i cal wa; doko miero gin kibed kede loc i kom deknam, kede i kom winy me wi yamo, kede i kom doke, kede i kom leini me obar dedede kame tie i wi lobo, kede jame me egere dedede kame liao alia i piny. **Ageini 1:26 GNB**

Winyunu jotel wu di ikounu jalere i loc gi, pien gin kigwoko cunyu bala jo kame bino tatamo i nyim Rubanga epone kame kitimo kede tic noni. Poore kitim manoni kede kilel do weko kede wangcunyu, pien mano likame romo konyo wu. **Joeburania 13:17**

Olegunu:

Rubanga Ngabed nakanaka kede Papa wa kame tie i malo, wan obino buti kede iswilar me ateni pi raco dedede kame wan otimo i tic wa me jogwok. Wan odudubo piny, doko da otio kirac kede jamini me piny kame oudo opoore gwoko kiber. Mi wa bobo odok nyen di iko mino wa obed jogwok kabeco. Olego i nying Yesu.

CENG ME KANY (5):

IN ITIE TUAI?

Eber ne ngakirisito acelacel ruruco ngingico kuo mere nakanaka, di kede ateni en eko ngeno epone kame en etie upere kede Kirisito.

Miero dano kong ngingico kuo mere, en kame mio di eko camo mugati kede mato kiye ikopo nono **1Jokorinti 11:28 (GNB)**

Otieno me ceng nono di piny okwei, gin kiko winyo di Rwot Rubanga oudo tie ot ki poto, di gin kiko pwono ne Rubanga i dier yen me poto. Do Rwot Rubanga oko lwongo icuo di eko penye be, "In itie tuai?" **Ageini 3:8&9 (GNB)**

Di bin etuno kunono, en eko donyo i abo moro eko buto iye. Di Rwot oko waco ne Elia be, "Nyo kame itie timo i kan?" **1Abakai 19:9**

Pien kisa ka Rubanga otieko neeno, di eko kelo ne jo dedede alako. Kisa nono pwonyo wa weko kuo me dagi Rubanga kede mit me piny, kede pi bedo jo kame dio mit me kom, jo kame tie kede ekite koriere kede kuo me woro Rubanga i piny kan. **Tito 2:11&12**

Nenunu, ango atie cunyo i dog ekeko di akukungo; ka ngatamoro owinyo dwana di eko yabo ekeko, ango abino donyo i ode di ako cam kede en, di eda eko cam keda.

Gianyuta 3.20



Di Yesu oko waco be, "Simoni, Simoni, neningo, Sitani otieko udo twer kibut Rubanga me tamo wun dedede, me wek eyek wu bala kame koyeko kede kal ki kom cucung. Do ango atieko lego nin be kur yei ni poti; doko kame ilokere idwogo buta, poore inen be isupo cuny imiegu ni." **Luka 22:31&32**

Akodi ngec nin me aura nono kalamo niang nango; etie ngec amalo twatwal, omio likame ango atwero niang iye. Atwero ot tuai pi pwono ne in? Arabo aring tenge tuai ki wangi? Ka ango aoto i malo, udo in itie kuno; akadi ka ango apeto kabuto na i kabedo me jo oto, doko udo in itie kuno. **Sabuli 139:6-8**

Olegunu:

Papa kacil Won kisa, wan opaki pien in iber, doko amara nin bedo nakanaka. Kony wa ngeno tie wa buti. Pwony wa ngeno yik nin atie i tam wan. Kony wa bedo i nyimi nakanaka di otimo gikame in imito. Olego i nying Yesu.

CENG ME KANYAPE (6): KAKAME KUO WA WOK KIYE

Kawok kaber kede kabedo kopooore kelo ajikini kaber

Caden nono en ine be, Rubanga otieko mino wa kuo kame bedo nakanaka, doko kuo noni tie i Wode. Ngat kame tie kede Wod udo etie kede kuo; do ngat kalikame tie kede Wot ka Rubanga likame tie kede kuo kame bedo nakanaka. **I Yokana 5:11&12 GNB**
Ango en olok; wun en ajange mege. Ngat kame dong i ango di ada ako dong i en, ngat nono en kame bino nyako anyakini atot. Pien likame itwerunu timo gimoro abongo ango **Yokana 15:5**

Rubanga owaco be, "Ango abino lako jo kame mara; abino gwoko jo kame ngea. Ka gin kilwongere buta, ango abino gamo dog gi; abino bedo kede gi i kare me peko, ango abino lako gi di ako mino gi kiudo wor. Abino mino gi kare alac me kuo, kame bino romo gi, di ako nyuto negi alako na." **Sabuli 91:14-16**

Piento en esasiro dub na dedede, ecango tuwo na dedede. En elako kuo na ki ates, enyuto na amara kalikame lokere kede cuny me kisa. En emia jamini abeco i kare me kuo na lung, tetekeny abed dano kodoko nyen kede kame tek bala ekokom. **Sabuli 103:3-5**

Olegunu:

Rubanga Ngacwec Papa wa, wan ongego be in en kame ibedo acakini me gi dedede kame makere kede kuo. Wan okwai pi konyo wa kede telo wa i gi dedede kame wan otimo. Wan olego i nying Yesu. KAMANO

CENG ME KANYAARE (7): ABINO NENE TUNO I AJIKINI

Do Yesu tie ngasaseredoti me ikar kede ikar, piento en ekuo nakanaka. Pi mano, i kare dedede en atwero lako jo kame nyiko bedo iyapiyapi kede Rubanga di kibeo kibute, piento en ekuo nakanaka pi ngangao Rubanga pirgin. **Joeburania 7:24&25 (GNB)**

Pien Rwot kikome oyaro bino piny yai ki malo kede redo me akarinkin, kede lwongo me



malaika adwong, kede koko me agwara ka Rubanga. Di do jo oto i Kirisito en kame ko bino cako yaruno; di oko bino gwaro wanunu jo kame odongunu di okuounu karacel kede gin i idoun pi riamo kede Rwot i dier yamo; di okounu bino bedo kede Rwot nakanaka. Pi mano, diunu cuny ngat acelacel kede kope nogi. **1 Jotesalonika 4:16-18**

Pien ango angeo be Ngakonya tie kuo, doko da i ajikini en ebino pido pira. Akadi bed bala tuwo otieko dudubo del me koma, do ango abino neno Rubanga di pwodi koma noni tie. **Yobu 19:25&26 (GNB)**

Bala kite kame kocoko kede doi di oko wango i mac, ebino timere kamanono da i ajikini me piny. Wot ka dano bino oro imalaikan mege, gin kiko bino coko jo dedede kame tao ne jo apat dubo, kede jo kame timo gikareco kiye Ajakanut mere, di kiko uco gi i mac kodop kakame jo bino koko kede mwodo lak gi kiye. Di do jo opoore ko bino rieny bala ceng i Ajakanut ka Papa gi. Ngat kame tie kede yite wek ewinyi. **Matayo 13:40-43**

Olegunu:

*Papa Won Twer; wan okwai kede mwolo pi konyo wan bedo tie i nyimi nakanaka.
Wan ongeo be in ibino dwogo oomo kanisa kame li kede angwal moro. Kony wa
bedo jo kame tie i kom ekodet kobedo kanisa nin.*

CENG ME KANYAUNI (8): YOMCUNY ME TIEKO KIBER

Etie kakaler be kame wan ouperenu kede Rwot, otiekunu kiber

Abaka Daudi bin ocao kiber

Di Samuel oko kwanyo tung diang kame moo me olibeti oudo tie iye, di eko wiro Daudi i nyim imiegu mege; tipo ka Rwot kede twer mere oko donyo i kom Daudi cako ceng nono ot anyim. Samuel oko yai eoto Rama. **1 Samuel 16:13**

En ebin enyuto gen kame lworu li kiye i kom Rubanga di en awobi

Kakame Goliat oudo tie bino kede pi riamo kede Daudi, Daudi oko ringo awakawaka tetu kakame isirikalen me Pilistia oudo oriere iye pi en ot yi kede Goliat. Daudi oko rwako cinge i ii ikapu mere, eko kwanyo engaro di eko pworoso en kede aporocet, di eko dipo Goliat i nyime; engaro nono oko lwiny i nyime di eko poto piny ariebacuny. Aso, Daudi oko bwono Goliat kede aporocet kede engaro kenekene; en edipe paka poto piny di eko neke; Daudi oudo likame tie kede epima moro i cinge. **1 Samuel 17:48-50**

Do likame eko tieko kiber

Samuel oko waco ne Saulo be, "In itieko timo tim me mingo; in likame ilubo cik ka Rwot Rubanga ni kame eciko ni. Rwot oudo oyaro mino ajakanut nin cungo i Isirael pi ikar kede ikar. Do nataman ajakanut nin likame bino meede; Rwot bino udo dano kame cunye mito di eko mine edoko ngat kame pugo jo mege, pien likame itieko lubo gikame Rwot ociko ni pi timo." **1 Samuel 13:13&14**

Saulo likame ocao kiber



Do Saulo oudo tie tilaro jo koyei Kirisito. En oudo ebedo donyo iot acelacel di epeo cuo kede mon kame bin oyei Yesu ooko, di emio korwako gi i otkol. **Tice me Joor 8:3**

Do kakame Saulo oudo pwodi tie meede wowono kede neko jo kame lubo Rwot, en eko ot but Ngatel Josaseredoti. **Tice me Joor 9:1**

Saulo olokere di eko mino kuo mere but Rubanga

Do Saulo kame nyinge da Paulo, oko pong kede Tipo Kacil, di eko ciko wange i kome, di eko waco ne be, "In nywal me jwogi, in ngakwor me gi kopoore dedede, ipong kede angalo kede tim areco, mam in likame ibino weko gogomo yongayo koriere ka Rwot? Neningo, twer ka Rwot nan opoto i komi, wangi bino to di likame iko twero neno wang ceng pi kare moro." Cucuto nono di ekuna kede colo oko umo wange, di do eko cako ot di emo jo kame romo pene kede cinge. **Tice me Joor 13:9-11**

Saulo omio caden mere i ajikini

Ango atieko yi kiber, atieko ringo paka i tol, atieko gwoko yei. Cako nataman, kotieko iiko na giamia me loc pi bedo ngat kopoore, kame Rwot ngangolkop kopoore bino mina i Ceng nono, doko likame ebino mino ango kenekene, do ebino da mino jo dedede kame daro dwogo mere kede imue. **2 Temeseo 4:7&8**

Jo dedede mito Kirisito pi tieko kiber

...do ngat kame mato pii kame ango abino mine, likame orio bino neke; pii kame ango abino mine bino doko ne atan me pii kame mol tuno i kuo kame bedo nakanaka.

Yokana 4:14

Ango atieko waco ne wu kop noni tetekeny ibedunu tie kede mulem i ango. Ibinunu bedo kede peko i piny kan, do diunu cunyu; ango atieko lono piny. **Yokana 16:33**

Di Sakayo oko yai malo, di eko waco ne Rwot be, "Neningo, Rwot, ango ayaro mino dul me jame na but jocan; doko ka lem oudo arodo gi ka ngatamoro, ayaro cule kame rom kamanono tien ongwon."

Yesu oko waco ne be, "Alako tin do otieko bino i ot noni, pien eda ebedo akwar Aburaam.

Luka 19:8&9

Do papa mere oko waco ne jotic mege be, 'Susunyunu kelo ekanso aber ingapunu ne, di ikounu rwako epeta i lwete, kede ikounu ngapo ne amuka. Di ikounu kelo etobait kame mio ingolunu, me wek ocamunu kede kilel. **Luka 15:22&23**

Jo atos kikom jo kotieko to bino kuo bobo; mogo bino bedo kede kuo abedo nakanaka, kede mogo bino bedo kede lewic kede acae kame bedo nakanaka. Jo ariek bino rieny rieny kacal bala me edou me malo; kede jo koudo opwonyo jo timo gikame opoore bino rieny bala acerin pi ikar kede ikar. **Danieri 12:2&3**

Olegunu:

*Papa kalit newa kame tie i malo, wan oketo gen wa i komi. Kony wa tieko kiber i gi dedede kame ocaane iye i wi lobo kan kede pi kuo kame bedo nakanak. Wan olego kamanoni i nying Rwot wa Yesu. **KAMANO.***